

# INUIT ATAQATIGIIT INATSISARTUNI



UKA:2022/70

Ulloq saqqummiivik: 13.Oktober 2022

Illit atit: Mariane Paviasen

**Inatsisartut aalajangiiffigisassaattut siunnersuut, Naalakkersuisut peqquneqassasut misissuissasut Royal Arctic Line Kalaallit Nunaannut avammullu assartuinissamut sullissinissamik akuersissutaata atuukkunnaarsinneqassappat pitsaaqutissai ajoqqutissaalu, taamatuttaarlu assartuinnermut unammilleqatigiinneq eqqullugu. Misissuineq takussutississavaa sullissinissamik akuersissut peerlugu unammilleqatigiinnermillu eqqussineq aningaasatigut kingunissai qanoq isikkoqarnersut. Misissuineq Inatsisartunut UKA 2023 nallertinnagu tunniunneqassaaq.**

(Inatsisartunut ilaasortaq Jens-Frederik Nielsen, Demokraatit)

Siunnersuuteqartup siunnersuutigaa Royal Arctic Line-p Nunatsinniit avammut assartuussinermik sullinneqarnitta atuukkunnaarsinneqassagaluarpat suut pitsaaqutigissanerai ajoqutigissaneraaluunniit misissorneqassasoq.

Nunatsinniit Nunattalu avataannut assartuussinermik ingerlatsisup Royal Arctic Line-p maannamut kisermaassilluni ingerlatsinera atuisut ilaanniit apeqquserneqartarpoq, isumaqartoqarpoq kisermaassisussaataanerup peerneqarneratigut assartuussineq akikinnerulissasoq, taamalillunilu nioqqutissat akikinnerusumik pisiarineqarsinnaalerumaartut.

Annertuumik nunanit allanit atortussianik, nerisassanillu tikisitsisariaqartarnitsinni pisariaqartoq tassaavoq assartuussinermi akinik appasissunik periarfissaqarnissarput, tamannalu unammilleqatigiilluni ingerlatsisunik periarfissiinikkut iluatsissinnaanersoq paaserusunnarpoq,

# INUIT ATAQATIGIIT INATSISARTUNI



inuiatigiimmi atugarissaarnerunissaannut pisariaqartipparput  
akikinnerusinnaasunik ingerlatsisoqalersinnaanera, uanilu  
misissorneqartussatut siunnersuutip takutissinnaavaa ilumut nunatsinni  
akikinnerusumik ingerlatsisoqarsinnaanersoq.

Naak maluginiartareeraluaripput nunani allani assartuussinikkut akit ukiuni  
kingullerni qaffariarujussuartut, aammalu nunatsinni umiarsuaatileqatigiiffiutitta  
nassiussalerinermi akigititaminik qaffaasimangikkaluarluni, orsussap, allanillu  
akeqartitsilernermini qaffassimagaluartut, taamaattoq ukiut ingerlanerini  
oqariartuutigineqartartoq nunatsinniit nunatsinnullu assartuussinerup  
unammilleqatigiiffiusumik ingerlatsivigineqaleruni akikinnerusumik  
ingerlatsiviusinnaalissagaluartumik oqaatiginnittoqartarmat soorunami Inuit  
Ataqatigiinniit paaserusupparput oqaatigineqartartut tunngavissaqarnersut.

Eqqaamasariaqarparput ukiuni makkunani Royal Arctic Line-p nutarterilluni  
ingerlanera, misissuinermilu inerniliussassani periarfissaqartittariaqarnera  
eqqarsaatitsinnittariaqarmat ,misissuinerup ilagisinnaavaa  
umiarsuaatileqatigiiffiit nunarsuatsinni piusuni sorliit nunatsinnut issittup  
imartaannut angallassinissamut piunasaqaatinik naammassinnissimanersut  
taakkulu akigititaat unammilleqatigiilluni imarpik ikaarlugu assartuusinnissamik  
toqqaassagutta pisariaqarmat sillimaniarneq aamma eqqaamaneqassammat,  
nunattalu avataanniit umiarsuaatileqatigiiffimmik allammik toqqaaniarutta  
nunatsinniit aningaasanik annissuinerup annertunerulernissaanik  
kinguneqarsinnaammat, taamaammat misissuinnissaq siunnersuuteqartup  
killiliussaa orniginagu piffissamik sivilisunerusumik misissuinermik  
ingerlatsisoqartariaqartoq Inuit Ataqatigiinni isumaqarpugut misissuinermilu  
saqqummiussineq 2024-mi pissasoq siunnersuutigaarput. Misissuinerup aamma  
imarisariaqassavaa nunatta avataanniit umiarsuaatileqatigiiffiup immikkut  
akilersoriarlugu nunatta iluani assartuusinermut ikaarsaartariaqassanermi  
aningaasartuuteqalernerulersinnaanerput, tassami nunarput isorartuujummat

# INUIT ATAQATIGIIT INATSISARTUNI



imarpik ikaarlugu unammilleqatigiinneq pilersinneqassappat  
umiarsuaatileqatigiffitsinnut sunniuteqarnerlussinnaammat,  
nunaqarfittatsinnullu pilersuinerup qanoq eqqorneqarsinnaanera aamma  
eqqarsaataasariaqarmat.

Ataatsimiititaliamullu susassaqtumut ingerlateqqipparput.

Qujanaq